

四庫全書

集部

欽定四庫全書

東堂集卷四

宋 毛滂 撰

七言律詩

次韻方明叔見贈

法書亂眼極牛毛
卒業何時愧李翱
好在先生無燥濕
老來秀句絕孤高
不知蹭蹬沉鸞枳
却念疎慵似馬曹
誰薦薛公經行著
折腰江縣豈殊褒

曹使君舍夜飲歸步月出城山色如畫作詩一

首寄曹

西曹滿百第相聞東閣招延氣自春雞肋天教辭怒臂
牛心公與慰饒唇酒紅欲去風吹頰山碧來迎月滿身
步入栢陰清夜急敲門惟有鶴鷹人

對雪二首

玉京咫尺不應疑龍鳳交橫舞屢儗素色可能粧粉並
真香直到齒牙知珠樓先曉月未落瑤草自春天亦私
千里一裘誰有樣鄒郎吹律為薰之

空庭白鳳舞毵毵撲帘窺簾去却回柳絮似將春色到
梅梢不認月華來輕盈舞殿三千女縹緲飛天十二臺
定有仙人來種玉藍田歸計少徘徊

桐君山邑人呼為小金山桐君所廬也

塔廟新嚴跡半空山前山後但孫桐樓臺影壓浮天浪
鐘鼓聲隨過岸風定有龍宮在深碧初疑海市變青紅
衆醫不識人間病遺錄誰知藥石功

代人和孟羽

東野多窮輒自鳴半生雲水共將迎朝廷纖悉收遺老
筆勢巉巖壓後生天上恩袍新草色道傍詩句古鐘聲
出秦壯思磨鋒鏑欲破劉郎五字城

生日

案題有脫字

要作人間浩蕩春便應三日對東君萬牛早汗十圍木
百穀終甘一寸雲天下公侯端有種日邊鴻雁不離羣
寶爐善頌區區爾何似君陳德似薰

代館職應詔和元夕

太平樂事及黎元
桂月蘭燈照有年
景焰煌煌浮魏闕
清光穆穆抱堯天
皇明燭遠輝星斗
睿唱宣和勝管絃
十二明珠供照乘
夜光飛出九重淵

送朱朝夫過江北

愛君如竹可無君
君去吾歸麋鹿羣
他日漫同千里月
明朝相望一江雲
餘尊尚得須臾語
新句那能欸曲聞
人到寄書應不識
花間但覓醉參軍

送遐舉解德清縣章

吏最年來三再書野梅官柳映歸途不容車下牛將犢
猶說桑間雉領雛萬里摩霄看鵠舉一城臥轍作兒呱
東鄰病骨誰料理十駕相追肯少須

和孫守三月二十七日開宴

繡段遮簷玉刻樽揚州春色最先醺落花風起舞茵捲
秀嶺烟生媚黛分酥面錦靴輕轉雪粉吭牙板細留雲
要他桃李長依舊不借東君借寇君

次韻曾公袞

翩翩公子蚤知名詩句年來特地清客館可應堪倒屣
蕪編曾不累懸衡南飛倦翮都無興北道主人終有情
想見綠疎前夜雨跳珠甃玉伴吟聲

縣境不雨數遣比丘禱佛於廟祀龍於社皆不
雨聞龍居響潭水中往潭湄刑鵝而祀之初崖
月微明有風颯然動衣袂祀竟雲物出雨態生
已而遂雨然歲豐時和蓋造物者之力而龍之
惠也至前此不雨乃令之無狀所召爾縣之諸

儒反為歌詩以雨歸令甚無謂聊作一詩奉報

自酌椒漿酌紫淵步虛聲徹羽衣翩

原註祀日先遣道士作步虛聲被除

不祥壇心月冷刑鵝俎雨脚風搖浴豨天

原註雨書云河中雲如浴豨乃

雨百里飽看紅穠極一杯輕愧黑蜿蜒韋編漫記經綸
事老對雲雷却惘然

縣境不雨禱響潭得之明日一龜出潭水上取

以歸縣齋諸進士有詩因作一首

崖雲送雨一村涼千頃扶疎綠穎香白馬誰將河伯命

縑車先趣大夫裝老來未覺巢蓮近遠去惟知曳尾忙
趁我還山先辟穀林間日月伴君長

孫使君約觀燈以病不果往以詩見強次韻和

酬

羅綺山前捲旆風夜游車馬畫圖中落梅已恨青春減
投轄那憂碧酒空座上精明唯定國

原註公爽健過人
深夜對客不少見

勅眼中耐久祇元同

原註來詩道苦
而故人之意惓惓不衰

勤呼為惜

蓮燈爛多病猶貪芋火紅

燈夕當三日而罷今至四日五日國人尚紛然
出遊勢不可禁天既雨仍作小晴老稚皆有閒
暇不迫之色千兵所至驩呼隨之此前未有也
聞使君復為人強出聊作小詩記一時之事

廉纖飛雨為誰休爛漫懸燈總未收自是一年無歎息
不妨五夕得嬉游後車鶯燕春聲軟前騎熊羆夜氣遒
兩對紅紗三百炬插花攜酒趁遨頭

定光梅開僕以病未能往觀亦緣此辭閣立之約

今辱示詩走答一首

七里梅花自一村
縣樓目斷暮雲深
玉人為弄昆溪笛
塵榻空橫單父琴
知有春心傳庾嶺
可無雪興在山陰
金鞍簇馬何時到
試聽東堂偈仄吟

伯駿同官以僕禱雨龍湫屢效百里荐歲熙和
官曹無事作詩見寵輒次韻奉酬一首

荐歲熙和屬臥龍
得分閒暇與君同
春筵縷雪衾裯足
午甌吹珠頰輔豐
蜥蜴興雲誰汝信
商羊舞雨自言功

州人欲識餘霏雪寄與飛廉百里風

原註武康去州城
百里前日大風折

木隨即見雪乃
禱龍之明日也

代張蘭送太守

電轉雙旌雨結愁水流行色過芳洲
臘風殘月誰交取
別酒離歌且駐留
千里溪山記詩伯
一年鶯燕識遨頭
朝天不作含香伴
為想林間春意幽

代張菊

去年出郭麥風秋
憶共兒童逐細侯
煙雨一溪行色動

管絃千里頌聲留
斷魂南浦橫離恨
注目東山想舊遊
西檻露團春不管
抱叢寒蝶伴清愁

王治中招余飲丹陽劉公雪苑英公在座主人
俾余坐中席僧居左道居右衆賓列坐兩傍曰
道之所在也余敢當此哉為詩以謝之

宇宙中間道最大
禪仙並立儒為尊
誰將幻怪驚愚俗
總向虛空認法門
此土猶知名教重
昔人尚有典刑存
愧予晚陋羞前哲
願以鄉盟齒弟昆

原注此後無論教只序齒

和巨中游芝山

俗狀塵容欲養成，猶慚岫幌不吾扃。
任慵讀律知難入，忍睡看山輒暫醒。
蘭茁有時應吐秀，茗根無味強通靈。
朝霞夕菊全堪飽，肯給侏儒學歲星。

次韻答琳老

雲水肝腸要掃除，筆頭費盡淡工夫。
居山應免逢京兆，過我聊當見子虛。
夜臥春蒲諸念冷，晚吟秋漢一峯孤。
打包來作臨邛客，車騎雖無亦甚都。

奉送徑山無畏老人謁吳興蔣使君無畏能作
詩寫字去徑山五年遨遊江南以歸遂過僕於
此聊館之旁寺老屋三數間而已當坐名山勝剎
大佛事而此非所宜安也

一生凜凜伴龍湫末後飄飄逐置郵老屋相安真煦沫
扁舟獨往亦浮漚晴沙照影支離晚寒研磨煙骨董秋
八月驚潮翻口角鈴齋說似古裴休

送參寥遊京師

青鞵布襪脚騰騰行住湖山自滿膺朝日已升天皓肝
秋風猶弄鬢鬚髻道逢京尹聊須避坐列諸王儻可登
認取參寥泉上月綠煙開處在觚棱

次韻琳老

夢魂夜夜釣魚臺懷抱何當亦好開竹日一窻窺我病
溪風三里送詩來天花散滅雙瞳冷香燼蕭寒萬相灰
欲與道人遊物外故山情在首重回

徑山無畏老人從旁郡來解包武康觀音院昨

日訪別云當走錢塘吳興二郡謁林豐二主人
僕怪其枯槁淡薄士當無求於世反從事於王
公門墻下老人知僕意因云二公有道士我佛
所謂大長者輩今佛長城在彼我當歸之僕是
其說作詩以餉其行老人常掛瘞鶴銘於座右
自言得其行筆法又苦吟名於士大夫間屢過
僕東堂飯每稱吾家飯美以故併載詩中

海上仙人為守關杖頭風月冷金鑲祇緣長者曾傾蓋

不為諸侯故出山瘞鶴字勤衫袖黑敲門詩苦鬢毛斑
歸來一鉢東堂飯自有溪雲作伴閒

僕罷官東歸過杭州寓六游堂而樓閣倚空江
山在目僕甚樂之無畏老師自武康送客至此
過僕於此堂之上留飯終日頃僕作武康令居
縣之東堂每與師飯於堂上數稱東堂飯美每
食輒兼人別十數年飯猶健也然師於世故泊
然了無芥蒂獨於東堂故人若不能忘情者亦

復可怪戲作詩一首其末併道所懷

道人送客過林扃先識穿雲拄杖聲
內苑深居無一念東堂久闊尚餘情
且欣能善將軍飯未怪頻翻吏部羹
小住家風殊不惡一江明月看潮生

原註內苑老師新作彌勒殿檄名

僧惠澄從余學詩

花開花落古東溪
賸馥殘膏今在誰
後世那能接光焰
上人聊復問藩籬
散花高座真無事
乞食空腸僅不飢
急喚清風下佳樹
盡吹塵土出詩脾

上元夜

翠輦遙窺日角豐陽光浮喜散雲同

原注十四日微雪

海山不動

雙龍矯天信頻頻一鶴通胡越照臨清景內唐虞消息
笑聲中六街鼓舞誰能強三尺兒童識帝功

五言絕句

過靜林寺用琳老韻作四絕句

空庭不見人烏啄僧臺食林深露未晞微風漏花漉
且來東堂日相值柳橋西癡鷺弔落花全學嬌兒啼

橙花亦娟娟照水弄清白孤香少人知黃蜂自為客
寒溪祇數尺炯炯涵晴空寄目誰與論翠荇牽春風

春詞

日催紅鞞鞢雪放綠蒙茸莫向東郊去王春在九重
雲母春冰薄毵毵曉氣暎尚垂宵旰意加惠及元元
雪盡牙籤暖芸生竹簡香夜分猶樂此定喜日舒長
精華初結紐壁水再逢春杞梓扶疎見君王自作新
雲避南山曉天回北斗春榮光生八彩壽色雨嶙峋

君恩破寒色天笑覺春回先暖延和柳曾無羯鼓催
瑞日暉暉上非煙冉冉收晴川蠶可浴翠潄荇初流
栢酒勤稱壽椒塗蚤却寒靜無遊樂事殊闊濯龍歡
曉光開繡幄晴色上金除初進春衣窄猶應澣濯餘
庶草將蕃廡羣陰自退消遲遲杏梁日長照紫宸朝
八風調養力九地發生深共被年豐賜誰知日是心
現睨黃鸝出參差紫燕飛君仁量爵闊惠及羽毛微
粉壁椒花馥瑤釵彩燕翩東風呼喚得隨意作春妍

日養千花氣風和百和香君王自仁壽栢葉更稱觴
寶厯垂無極璿璣轉未央繡楹膏露潤玉殿紫芝香
穆穆清光外蔥蔥佳氣中雲天看斗柄寰海受和風
玉甃蘭封麝瑤池柳養金宸章先造化摛藻自春林

夏夜

毒暑彌三伏微涼起二更月窻風竹亂煙渚露荷傾

案此

詩從宋詩
紀事采補

七言絕句

卷四
遊石橋寄郭庭晦

亂峯攢劍護清幽，萬壑雲煙暮不收。
欲就詩壇借旗鼓，為君爭取一橋秋。

偶成二首

隨風出岫不知歸，身落黃塵夢翠微。
本亦無心膚寸事，故山却合自由飛。

此生弱草寄輕塵，辜負南山笋蕨春。
好去桃花破浪暖，清風明月不辜人。

琳老送瑤花數葉云作香燒氣甚清韻

璀璨誰將玉作春
天魔故惱老詩人
金爐送在東堂手
便有清香通四鄰

德清五兄寄清茶

玉角蒼堅已照人
冰肝寒潔更無塵
鳳凰雨露生珍草
不比榛蕪亦漫春

送茶琳老

道人詩思前溪水流
出山來亦自清謾
寄鳳凰臺畔雪

不妨竹裏潤琴聲

競渡

風旆悠悠水薄船
浪花翻覆自搖天
汨羅誰復追忠義
爭快兒郎一棹先

石校書

按書使者過蕭閒
但恐韋編有蠹干
豈識郝公藏萬卷
平生檢校費心官

雨中採石菖蒲

皂蓋銅章久汙人青鞵布襪亦生塵今朝獨向秋雲裏
幻出林泉自在身

濺濺小水碧逶迤叢菊寒深蔓翠垂採得菖蒲未歸去
滿身煙雨立多時

秋雲作伴更誰俱頗慣登山不用扶笑怪河陽種花手
杖藜破雨覓菖蒲

碧澗潺潺珮玦鏘錦苔織翠護昌陽玉真新洗羅裙帶
流出僊雲水亦香

小雨蒙蒙濕槿花臥雲雞犬是誰家老人為指青崖路
童子能尋碧玉芽

原註時問路田父
亦攜小童採藥

聞琳老欲入山今少雨想未成行奉寄一絕

野僧報我泉新白此老居庵山更清雨湏故應須小住
雲寒端未出相迎

題貴溪翠顏亭二首

寒聲著葉冥冥雨晚色遮山冉冉雲且喜翠顏長好在
水邊小住可無君

船中自帶紅泥竈亭上親煎白乳泉唯有溪山知此意
水風吹面晚蕭然

贈程吳山人

十年貧賤欲如飭媿客殷勤話此生試與宋君尋卜肆
長安東市雨新晴

許子過示二絕句見索亂道因次韻奉酬

苦吟正在郊寒處

原註孟郊乃邑人

露草秋蟲亦共悲過我聊

當煮彭越不須苦覓外孫詞

筆頭風月無多子盡是前人追琢餘豈有聲名到溫李
僅能楚些屬三閭

正月三日游證道寺

水畔山前蹭蹬身三年魚鳥許為鄰
臨當解組槐陰下更看酴醾一夜春

題上元雪作題證道寺

故歲嬋娟獨自來今年更喚玉妃陪
要知霽色本無際端放眼
中雲霧開

和鄭叔詳送竹笋

渭川春色到龍孫
漸養侵雲百尺根
可惜斲來陪脫粟
葛陂留得看騰騫

某獲造司空府得至便座見文禽五六夷猶曲池上意甚得所慨然有感於衷戲作二絕句

許近清池養羽儀
恩波穩暖自忘歸
長依竹石供瀟灑
不學蒼鷹飽便飛

幾年不解向滄洲
矰繳曾傷質轉幽
端倚主人憐采色

要隨鷓鴣濯清流

石顧山虎跑泉久涿不食僕至山中為浚治而

去

自洗苔膚一尺寒烏菟那復此蹒跚不妨為我照毛髮
正可與人鑑肺肝

頃劉子先學士守姑蘇嘗寄洞庭春酒得為西
湖十日之醉今流落於此但覺村醪可憎戲作
一首奉寄吳天用使君舍人

劉郎曾寄洞庭春
小暖西湖十日貧
老去舖糟無揀擇
高風空媿汨羅人

偶得佳酒分寄陳巨中

南岳夫人綠酒春
近來未及玉膏醇
穆生不許聊須強
他日瀛洲是故人

春詞

春逐東風行地上
德隨和氣散寰區
聖人中正觀天下
道本無言教已孚

冰銷玉液鳬鷺喜日暖宜春草木長忠厚家風傳八葉
太平光景接三王

好生恰對發生時寬大恩流渙汗飛雷雨解成僵拊動
蓼蕭詩就遠人歸

天光地氣與年新不覺人間一物陳初令雷霆端有信
舊餘霰散雪敢無垠

仙桃欲拂朝真臉禁柳忙催望幸眉不會君王春思別
杏花菖葉在農時

冰開御水龍鱗細日照宮梅麝炷烘欲看人間花灼灼
不妨葛藟共春風

誕敷文德金鈴振盡納熙河玉律諧御柳宮梅動春意
朝來黃鳥亦喈喈

玉殿重簾捲水晶椒花栢葉聖人清千春萬歲承明主
長聽雲韶歌管聲

雪纔盈尺雲陰解風不鳴條雨塊完春力急催冬事退
君王寬政不恒寒

君心與物為春久喚得春風破臘回天近自應通信息
梅花不用犯寒來

春色年年染御溝鳴頭輕綠弄花柔今年春到崑崙上
九折委蛇舞翠蚪

截肪初見昭華玉刀出昆吾寶籥開天助君王敷大喜
安排春色探先來

御溝梅柳寒猶噤芳草池塘暖尚微玉色怡融何事喜
一年苔綠遍園扉

宮漏遲遲不受催
出花光景漸徘徊
萬方日日春臺上
不道東風恰始來

雕雲燎馥沉香暖
綵勝風翻玉燕寒
天上春光來咫尺
瓊花瑤草徧闌干

瑣窻朱戶無寒到
長似春光日日來
自是螽斯載風什
可煩簫磬祀高禰

醴面桃花有意開
光風轉蕙日徘徊
昭陽天近知春早
玉琯東風破雪來

日射觚稜氣鬱葱
露華猶冷玉芙蓉
瑣窗朱戶春光暖
珠藥瓊花無數重

臘寒辟易沉香火
春意侵尋玉琯灰
陰德承天專靜厚
發生有助到根荄

風來太液冰先泮
日照延和柳未知
翠輦不緣花事出
行看荇帶綠參差

某視田至福慶院唐向履道歸衢與之追路于
此邑中學士成能師與劉知常汝明莫若師文

咸用古士服肩籃輿從僕遊秋盡一日穀既登
場郊行十五里間見牛背兒皆有厭雞黍色時
近境稍有以穀不粒聞而天乃獨以穰穰滿家
遺五邑民豈造物者哀令治亡狀姑用一飽蓋
其慚面耶遂與諸君飲酒于翠屏軒煮茶于秀
巖亭賦詩以相娛樂今日天寒霜下四山蒼然
盧橘始花五人舉白相屬口不道人間事孰知
僕乃沉埋簿領中人也

欄干倚盡赤梅檀
盧橘花開秀巘寒
會取虛庵留客意
小牕踈日上蒲團

蔡天逸以詩寄梅詩至梅不至

應念蕭寒槁木身
殷勤分寄嶺頭春
冰肌玉骨終安在
賴有清詩為寫真

罷官次常山寄鄭叔詳

閒身已置參軍幘
歸路仍推處士車
石室散仙當醉起
試傳消息過煙霞

與鄭叔詳飲石橋山

喜得青州好從事共登畢卓拍浮船
雲煙已借一千日山鳥不須驚醉眠

見戲

案此題疑有脫字

薄命何須問大來時時廢卷祇孤吟
故園松竹空荒徑可勝淵明一賦催

欲訪天柱山閣黎寄一絕句

三年不到上人家目斷晨煙與暮霞
急遣寄聲堂下水

便來洗眼看天花

琳老惠麤乾走筆奉寄

何人彈鋏苦思魚食肉而飛亦任渠誰見東堂病居士
山僧乞食亦分餘

汲水禪靜琳老寄詩因次韻奉寄

雲脚濤頭氣自寒了無閒夢到蒲團翠庵只在東堂裡
底下揚眉直下看

原註來詩云既面乳
花誰共看因以奉戲

跋李伯時醉僧圖

道人三昧一壺中
筆下驚蛇怖小童
日日松間好消息
酒香先過野橋風

訪琳老聞出赴供

賓頭應供未還家
聊借僧窻自點茶
此意不須相見說
已知秋色付蘋花

別歸雲庵端老

何年敗衲裏虛空
雪雁煙鳬不受籠
未信歸雲便端的
一船明月四邊風

寒食日過翠峯塔院示法海道人

雲煙七級赤旃檀龍護金函佛骨寒問訊道人春到否

瑞香花謝倚欄干

原註塔院欄檻外植瑞香僕至已零落無幾

子溫以詩將菊本見遺數日適病伏枕今少間

戲作三絕句以報

破煙涵雨得春叢想見當年老范公多病未須求茗草

此詩渾欲愈頭風

原註南人作菊茶以治頭風

盡鋤芳草春應怪初種黃花秋未知花外種松松外竹

漸無蝴蝶到東籬

更作天隨求枸杞試從子美覓黃精但知一飽輕方丈
不為秋毫要眼明

春曉

東臯紛綺水潺潺翠拂官橋柳欲眠出谷黃鸝終好在
辭風紅樹稍蕭然

酴醾春曉與誰芳自是新來雨露香燕子覓巢終軟媚
楊花滿路尚顛忙

爐香燼冷夾衣寒雨過園林翠作團
剝得風光何處著
紅薔薇搭小欄干

池塘綠淨了無塵造化裁餘十日春
月樹清深語鶉鴂
幾時歸去亦謾人

二月二十八日禱雨龍湫

折腰五斗自難堪每為斯人食不甘
赤地黃埃迷澤國
老龍飲血亦分甘

過淨林杏花下微見曉色

籃輿度水犯雲巢拂面垂楊翠欲交春睡穩人殊未覺
半分曉色到花梢

過吳淞江

參軍身外祇圖書獨與吳江分不疎歸去他年當辟穀
嬾隨波浪覓鱸魚

題琳老所攜二蘇書帖

道人此書欲在眼扁舟一宿亦隨身霽月光風開玉軸
千年髣髴見斯人

和孫守

回首長城臥落霞
雲開桂影過昏鴉
不須更要千紅翠
醉眼燈前已亂花

散藥過東湖戲作絕句寄陳巨中

誰為蒼生起病癰
參軍藥裏欲何如
湖東道義為鍼石
不用先生肘後書

次韻王宣義見過夜飲四絕

空琴誰為奏南風
坐看幽香走篆紅
定卜糟丘度餘日

此生那復問蒼叢

淒風落日酒家天何事囊中長一錢
快見渴虹橫酒戶歸須殘月上吟韉

崔郎傲兀見孤羈筆勢縱橫欲發奇
賦就何人知犬子杯深自喜對鵝兒

肯為張卿貴作奴不嫌喚客手攜壺
全勝一葉唯茶竈未負黃公賣酒壚

靈芝觀上人房植紫竹一本覆屋其上以庇朝

日顧雨露所不及也疑其當憔悴枯槁反蔚然
勁秀為作一絕句

堦前紫玉似人長可怪龍孫久未驤第放煙梢出簷去
此君初不畏風霜

訪孟令不遇

扶病尋君君未歸添香應惹踏門衣東風未破桃花萼
雪壓餘英蝶亂飛

常山孫令見過僕未起孫題壁而去作絕句寄

之

醉鄉冉冉夢游閒一夜涼風喚未還可是應門無稚子
雙鳬仙去定誰攀

門外初為羅雀地壁間偶見換鵝書忽然興盡何由揖
擬遣長鬚致鯉魚

夾道老槐分曉色出樓寒鼓報衙聲解牛敏手仍投暇
夢蝶閒身尚未驚

送茶宋大監

鳳凰山畔雨前春，玉骨雲腴絕可人。
寄與青雲欲仙客，一甌相映兩無塵。

玉兔甌中霜月色，照公問路廣寒宮。
絕勝自酌寒窻下，睡減悲添愁事叢。

響潭

水面平鋪映碧空，夜深明月照龍宮。
猿啼未響潭先響，一樹花開兩樹紅。

遊翠峯寺

隔牆楊柳舞腰斜
傍砌鵝梨玉作花
此地風光誰管領

小詩收入長官家


宋以上二詩從
宋詩紀事采補

晝寢石頤寺

何人支枕古邯鄲
孤卧僧房四面山
故遣白雲遮谷口

不教幽夢落人間

按浙江
通志增



欽定四庫全書

集部

東堂集卷五

六

詳校官庶吉士臣陳若霖

侍讀臣孫球覆勘

膳錄監生臣沈

霽

欽定四庫全書

東堂集卷五

宋 毛滂 撰

制

龍圖閣直學士太中大夫知亳州王益柔可差

知江寧府制

勅江東鉅屏莫極金陵惟我邇臣宜承重寄具官某夙
多踐歷今為老成委以拊循庶言惟允鎮茲剽俗繫厥
靖猷服此命書往其無替可

承議郎直集賢院范育可權發遣鳳翔府制

勅某扶風者蜀隴通秦之控也異時商賈輻輳獄市繁多故最為關中之劇郡爾能以儒學潤飾吏治而又風俗習焉故因以命汝勉服訓辭務修循績可

朝議大夫守吏部尚書曾孝寬可資政殿學士
知潁昌府制

勅入正六聯出分近輔眷維舊弼推錫龍章具官某溫厚端方淹詳博敏早聞邦論久典治官比厭劇繁屢申情

懇永惟加惠固所重違祕殿華資陪京樂土往繫坐鎮
毋闕告猷可

表

進恢復河湟賊表

臣某言臣頃以縣令守陛下民社於封禺山中日夜所
以噓呵父老磨礪子弟皆仰承熙寧元豐之遺德故臣
於當時簡書號令亦竊耳剽日久陛下初登納牖之法
座道隱旒纁恭默不言適大臣新用事頗失經綸之意

孤奉陛下仰成之恩而觖天下望臣甚惑焉明年臣當
改任西入國門竊於道路聽聆風聲尚因循而踵故也
小臣不知國家治體其惑益甚未幾舊德真儒更起於
江湖上翔集廟廊於是其風丕變稱陛下之意慰裕陵
泰陵之神明快士大夫之心治與古合惟是河湟故封
棄而未復臣惑未解忠臣義士所共憤懣然又未幾湟
中之地指麾而定雋功休烈無愧前日方聖謀獨運天
機默啟而奇蹟未暴也將士猶休馬解甲而枹鼓未鳴

也臣竊聞縉紳之論老兵宿將之言咸謂狐兔穴深恃
險守隘鎧甲犀利其衆梟雄敢死而善戰故將士不敢
有輕老羌之心吞河湟之氣然天聲一臨威武紛紜湛
恩汪濊鳥驚鼠竄游魂窮山不知死所臣然後知聖人
有作天應地隨關機闔開神聖出入妙乎其不可識矣
矧廟堂之老帷幄之傑仰奉睿謀如手應心此豈容天
下所共知也臣中謝恭惟皇帝陛下練天地之純粹攬
道德之精剛行大人正己之事知童子害馬之言倚丕

基於南山納衆流於東海使先帝十九年盛德大業上
格於天下格於地中浹於人而外冒四夷昆蟲有命之
物無不仰戴蓋自陛下夙夜追述續紹基構累積而峻
極如是也尚乃兢兢業業無自廣之色有為善不足之
意故小大之臣咸懷忠良僕御侍從罔匪正人日月軌
道風雨時節草木遂茂山川鬼神以寧而鳥獸魚鼈咸
若也荒服君長移珍抗手稱臣闕下百姓驩忭中誠感
發致治之敏尚以置郵為淹臣質之詩書考之傳記踰

唐跨漢引領軒虞所以稱治者五六君而已陛下棄其糟粕收其英華接武治道如涉東西之衢超此五六君蓋已萬里矣臣本江東諸生材學行能無可筭錄頗嘗漁獵六藝之囿素知筆硯淺事陛下天縱聖學言成五經昭回之光下飾萬物故褒衣博帶之臣相與涵泳聖涯丹青景化而結綬金馬之門磊落相望惟臣命薄骨寒抱病溝壑草木之年亦已晚晚尚區區誦書洛陽市中徒聞有四庫之典蓋曾不及蘭臺之蠹魚者也竊聞

王師掃洒湟中盡有故地功德顯著聲施甚美而大手
筆之臣炳然在廷其所以鋪張論述刻玉牒藏金匱者
其筆勢宜盡出班馬右方鳳鳴高岡鶴唳太清而小蟲
唧唧微鳴草間蓋時所感動而不能自己也故昧死獻
聖主恢復河湟賦謹繕寫隨表上進以聞

代人謝御製詩表

瓊章妙句仰煥奎文玉笋上尊俯霑濡澤既共懷郢握
之貴又獨袖隋掌之明豈以臣濫被九鼎之司故常使

識八珍之味垂光海宇共窺雲漢之昭回不夜臣家獨

見璇源之圓折

中謝

伏惟皇帝陛下多能天縱盛德日

新固已邪郭於五經不足喉衿於六藝訓誥追三代之
典則詞章存二南之風流豈惟殘膏賸馥將沾勻於後
人是謂非煙祥風當緣飾於萬物天清氣朗畫色永於
上林葩正華繁春工贊於宸翰寵踰華袞之重老增布
帛之溫願子孫之相傳付金石之同在伏誦膏雨之初
霽益見聖神獨運之功雖云羣生之有年敢拜君臣相

說之樂

代人謝殿監賜對衣金帶表

內監深嚴本有待賢公卿之選上恩優渥廼過意臣父子之間朝無一人之言澤自九霄而下聖主自為之獎目微臣何假於賞音苟一旦未濫於瓶罍是此生終辭於溝壑惟臣之遭遇可謂非常然時之滯淹豈無遺恨臣中謝伏念臣材非蚤就學最淺聞當百執事之間未免沾沾而自喜在九卿之列又羞陸陸而無庸每被使

令了無稱可差幸未盈於百謫云何不啻於三遷念當
却掃於衰門遂恐墜東山之望寧意乘良於壯歲曾不
知周南之淹超諸搢紳快如挿羽此蓋伏遇皇帝陛下
急欲求治每恐遺材雖俯仰太平出自聖神之獨運尚
網羅多士姑備左右之美觀如臣何堪逢時乃爾身居
供奉之內最為依日月之末光班隨侍從之間何但陪
鴈鴻之清集人間風聲塵土之不到陛下起居飲食而
預聞顧影若加華袞之榮撫心則懷薄氷之懼蓋衣裳

在笥臣有涼薄不勝之慚束帶立朝臣無詳贍可觀之
譽惟希古人之慎密以答上眷之周旋

代宋漕司謝上表

一麾出守所易堪小壘而寡民八使分行將難副連城
之重寄馳傳趨宣風之旨叩閭無望日之緣對青蒼識
所部之江山見父老示當頌之德意中謝伏念臣器能
甚陋風力不强空懷赤心素乏清問事主則有曾門之
餘烈家傳尚藏太史之遺書豈忘激昂了無表見一昨

備修書之數未幾塵持節之行亟召置於府僚旋擢居
於卿列念淒冷初榮根抵春施均被于惠風顧高華本
絕階梯秋毫皆歸於帝力所以未及逡巡而退却然而
深虞批抵之侵凌屬當守壘以須期迺復闔門而涉歲
曾未煖信陽之坐席遂已祇吳會之除書方其多士充
庭不乏鵷鴻之翔集特恐一夫失所尚計鳬雁之去來
誰為臣言自出天意惟臣際遇非人力能此蓋伏遇皇
帝陛下允釐百工旁礪萬物不令盛世致有遺才姑收

尺寸之長亦異尋常之寵矧驅駕豪傑俯仰昇平天人
所以調諧瑞應所以辨至鼎露淪軒轅之粹韶雲舞崑
崙之仙凝旒太紫之間洞燭寰瀛之表恩行雨作威至
電飛窮日月之所臨罔恩威之不逮既臻遠近之無事
屢逢東南之有年使臣更復何為報國能宣薄效第當
萬艘銜尾助陛下惠養元元一節究心免微臣因人陸
陸

進連理木表

兆民允殖惟一德之是歸厥木惟喬當至仁之所及在
木理何知而乃合見人心不約而自同玉華效祥甫被
上天之雨露道山呈瑞近蒙中禁之風光遠在偏州亦
霑餘澤况茲木之良異視他種而增奇獨引一枝相望
八尺修條中立屹天柱之承霄兩幹旁連矯虹梁而濟
涉嘗考圖書之所紀謂合海隅而為家恭惟皇帝陛下
道洽無垠德齊有截開闔之妙物被於曲成覆載之均
世容有異意茲表君臣一體而共理蓋符本支百世以

同昌念臣有固陋之愚雖孤民社之寄惟地出太平之
象自成草木之祥敢佐太史之筆端庶備昇平之瑞物

啓

上中書侍郎啓

折楊黃華僅能入於里耳高山流水寧當嗣於賞音譬
如鳳凰見而羣飛嚶鳴滄溟開而衆流歸往恭惟某官
巖廊大老衣冠真儒金匱紬書獨當一字之褒貶玉堂
視草遠追三代之文章至於穹廬奉對之專紫樞坐籌

之密增重本朝於九鼎制勝遐方於兩楹惟天之北斗
中樞應國之南宮左轄方當翼宣元化輔成人文可謂
勲德並隆文武備足是何區區路傍之小吏敢進平平
紙上之空言所憂唐突於璫璣非敢爭裂於綺繡藉令
優假終不自量重念某才不如人志空好古鉛槧淺事
昔嘗越趙韋布半生初無表見亡羊亦何異於博塞不
龜了莫及於封侯况羽翮不修合在榆枋之下語言無
味誰收俎豆之間鹽車甘駕馬以同勤竹簡與蠹魚而

俱老悟筆硯真取窮之具而文字乃招嫉之符徒使聲
鳴益悲尚無公幹之逸氣徐思少作可悔烏用相如之
浮華宜清朝數免而稀遷媿古人難進而易退髮今短
短而先化面久蒼蒼而色羞行路人得以揶揄士大夫
喜於倚捩此而不去何所欲為側聞遨遊上公之門竊
亦棲遲下客之座雖是尊卑之異等敢希臭味之同歸
况昔與諸生得共聞於綿蕝今隨庶物幸並出於陶埏
正應顧主而悲鳴先喜過門而大嚼矧屈借齒牙特達

之論曾不遺腹背闢茸之微惟寒谷氣遲未覺東風之
解凍睇繁雲目斷但傷急景之彫年端念學殖之已荒
無望儒林之擢秀日暮途遠空懷三徑之歸月明星稀
妄意一枝之托

謝舉主啓

聞冀北之足已空尚煩收致類遼東之額強獻盍取慚
歸頗哀蹭蹬之年少借殷勤之論竊謂薦士雖古知人
甚難或者好龍非真烏覩凌雲之異不然相馬失瘦莫

顧負轅之良欲觀其人當問所主初或收光而未耀終
有泣血以相明至如鈍頑敢累明哲伏惟某官雅屬時
望藹為辭宗開卷綆長而汲深故得百家之淵奧下筆
芒寒而色正獨燦一天之星華未參高妙之游尚屈澄
清之寄方廣洪河以容物執玄鑑而照人如魏王之瓠
無堪反浮沉而得所視無鹽之貌可惡將刻畫而難妍
某骭髀寡諧流落不偶幾欲請墮而治鄴本非好等而
求齊平生多奇固有定數際遇雖晚亦豈偶然鑽皮儻

挿以羽毛蒸朽或出其芝菌未能報德何敢辱知

又

植當道隔衆且指為苦李投畀爨下自寧必為良桐但
思襍被而言歸何敢執裾以求鬻竊謂薦士雖古得人
甚稀區區搖尾者了無可觀紛紛引手者亦何所見苟
不旁借聲勢則當外務街沾藉令黑白判於目前未免
寒煖移於筆下今見取於衆人之必棄使坐据於諸君
所共爭借清議未然或累公人物之鑒亦高風獨凜已

驚渠世俗之心伏惟某官邦家舊人師帥夙望雅抱遠
韻蔚為文華天子意在匈奴郎官尚淹於父老都市血
流俠少京尹未害為循良誰使時和而歲豐本出政平
而訟理晚遇有依劉之幸老狂慚薦禰之文蒼驥方騰
踏於夷途勢當致遠青松獨磊砢於羣木氣已凌寒乃
欲分餘力於薦筋綴和氣於凍拊俾一旦軒昂於款段
或異時追配於輪囷某少頗觀書初不讀律名姓空沈
於州縣年光半度於江湖未嘗知治而敢諱錦傷正如

學醫而惟恐人費倦龜欲遊於北海拄笏時望於西山
敢意提撕強令奮厲假以羽翰之力被之袞繡之言何
異披樂安之沙終日僅收梁粟聊試拭華陰之土半夜
或出光芒永懷推轂之門孰是銜環之地

又

弔影江湖未嘗備門牆之役借論牙頰誰當為根柢之
容既不類相士而舉才又不待察言而觀色嗟乎途且
遠而幾暮無乃樹雖病而亦春伏惟某官蔚為辭宗雅

仗名節進止自有表識闕者不為精神行陪前席之談
尚屈外臺之計問利亦仁義而已欲婢妾榮夷公之謀
理財非玉帛云乎蓋寢飯昭奚卹之意故屣履以見賓
客如懸衡而較錙銖甚若不材尚辱異眷重念某素著
狂直無他庸能平生最耻自媒老去每發孤笑唯有鈇
輦之技莫施簿領之間幸無箠楚之聲未敗弦歌之俗
久將自考下下以歸去安能更共陸陸而低徊敢意思
私首及孤冷獨是豐城之光怪望者有能識之竊比周

袖之良珍出則無肯售矣唯痛自洗濯將上報提撕

又

原注以文章可
累乞朝廷甄擢

揚子雲貌寢而官卑經雖玄而謂白九方歟機深而識
妙馬本驪而謂黃世方共輕其書誰復獨忘其外此蓋
先儒付之於悠悠者未應小子肯至於屑屑然借論齒
牙淪愧肌骨伏惟某官早馳令問蔚為重人暫屈使華
之南更未礙佳聲之北去無負勢驕人之氣有好古下
士之風謂簿書米鹽非豪傑之標的唯文章人物真太

平之丹青聊慨發以一言蘄振出於百里重念某年歲
晚晚形體支離當投筆研而荷犁耨賣袍韉而換蓑笠
恐難待西江之水逝投老東岡之陂空託知音無從報
德

又

僕射題目之幾何可勝東南之多士相君親舊之未及
況無左右之先容寵借一言本乏半面往有市扶神而
得老芋或至欲昌陽而進豨苓雖衆人之可蒙待良醫

而自判今猶饗萬錢之饌擷杞菊而並羞又如作千金之裘褰芟荷而同製伏惟某官氣大經世才高絕人馳聲象魏之都彌節湖山之會求於公論宜即近班至於出滯振淹真得古人之用意所謂承流宣化是從長者之折枝第如孤蹤誤煩雅眷某才穎不耀辭華易零長年與世而聲牙中夜撫劍而躑躅無言弔影有愧賞音借為趙魏之老或優尚念齊秦之路未效更當鞭後蘄副挽前

通問監司啓

八俊分行本自簡於上意二星所向殆亦出於天心故
欲賦皇華之詩必先賜清閒之燕至所以不待次而用
端必有過絕人之資伏惟某官間世遠猷當時秀望是
獨翩翩而蚤就何容陸陸以並驅唯金鸞振鷺之游將
觀步武顧木牛流馬之事聊試緒餘某蹭蹬涸鱗獨速
短羽鬢髮未老而先化田園將蕪而不歸姓名雖不序
於後塵形影盖久依於美蔭每欲追蹤丈人而獨往何

敢刻畫無鹽而自媒第嘗得糟粕於斷編亦時有筆硯
之淺事必當綴履請徑同兩錢之錐或許揚眉願少借
盈尺之地幸讀書不啗於妻子將定價謹屬於君侯

又

獄市并容衆仰冬曦之愛鷹隼始擊共窺秋漢之清方
人主欲觀昇平之風矧使者能養忠厚之氣頃旄旌未
辱蓋光彩已先恭以某官搢紳重人宗廟珍器况平番
乃屬老手正自談笑而有餘唯經綸久抱雅懷尚復卷

收而未究某日暮途遠肉緩筋驚未伸堂下之一言先辱鹽車之顧獨負胷中之百紙敢羞醬瓿之須

又

少年好學初如蠹簡之魚晚節為貧終類太倉之鼠壽陵欲歸而步既失單父雖細而形已癯尚何可言苟幸托庇恭以某官氣並冬日詞攜春華漢使繡衣尚提三尺之法道家玉字即觀四部之書方求史筆之精魂當屬文章之司命顧江生無買名之意僅存覆瓿之餘聞

韓侯有定價之聲輒累懸衡之下

又

初觀除目忻屬我輩於老成遠臨傳車想見國家之忠
厚伏惟某官學歷聞與氣摩雲天囊括底蘊而莫知有
餘瓊建淵源而亦復不竭竊意深惟於邦計正在厚斂
於人材至於飛輓之云聊發警效而已某生而寒氣仕
也強顏空憐編簡之光陰盡寄簿書於晝晚尚不念先
驅之訶罵獨仰望良醫而呻吟目力易窮姑獻十家之

縣江波無際幸容五石之尊

又

平粟待儉數泉均勞雖號熙寧之新書本是治古之美
意為法固善得人幾稀恭惟元符真人所以勵精至於
常平使者可謂妙簡况上自二千石之吏未嘗不因緣
以升沈遠雖十四州之民皆得赴愬其疾苦伏以某官
文學前輩搢紳先生聰明殆出於天資議論不牽於世
俗坐見人間之情偽皎如鬚眉之落鑑中立去部內之

邪姦快哉鷹隼之搏雲上某少學詩禮老沈簿書弄輒
磨鉛頃累名臣之論束帶斂板今隨俗吏之羣曾不知
傷錦之譏尚有志著書之事煩借牙頰當生羽翰

賀蘇右丞啓

丞轄天臺進陪國論賢者在位君子得興豈特糾八座
而辨六官要亦順四時而遂萬物出雲雷以下澤扶日
月而麗天明詔始頒公義交允伏惟右丞言有壇宇得
先公之靜剛思通神明跨伯氏而高妙器非近用者所

就必晚天欲大任者其始或勞時初嶮艱未免柔從於
蒲葦心獨閒暇曾不奪常於雷霆杜公有應變之才裴
公無左右之助顧斯文之未喪得其羽以為儀起游道
山進直青瑣發當年之涵蓄破俗儒之譏評玉堂搖毫
飾玉言於黼黻烏臺正色立朝士於風霜今膺夢求頗
慰人望某鈍頑無比嘗塵君子之下交榮悴既殊空記
先生之餘論安敢彈冠而蘄彙進且將拭目以觀太平

賀右丞啓

伏審光膺制命入贊政機國家用賢寰海蒙福竊謂學
稱堯舜人誰無致君之心材不臯夔天莫與經世之器
故雖抱經綸之學要必有王佐之材世非斯人書亦虛
語天地萬里在歌器安危之中民物九州寄小鮮熟潰
之內得人則置器烹魚之易失道則挾山超海之難惟
聖主有心三代之時挈昇平付公六人之手寵寄者可
謂重大素定者得不從容伏惟右丞當世真儒先皇遺
直公輔之望少壯已然譬豫章之木耿介於林中自然

有廊廟之質泰山之雲氤氲於石上無疑為霖雨之期
郁乎西漢之文章顯自北門之學士後千年大都通邑
尚驚史筆之精神比一時宿學老儒共戴文章之司命
此蓋餘事固已絕人究其淵源未及涓滴今當盡發六
經之微妙散為萬物之中和某二十年竊承下風嘗數
千里願効愚計晚能際遇謬塵筆削之間今遭棄捐猶
在陶鑄之內倘不從珮紳効能於鞭策尚當與蓑笠受
賜於江湖歡喜之多拙訥難盡

答曹守任中散啓

伏審下車云始褰帷之初蓋已蒞聽於休聲是曾不煩
於老手恭以某官天資之敏士譽所賢久更練于中朝
暫均勞於近服精明之力固自有餘愷悌之風正應不
乏當末期以報政宜不晚而召還某久念素餐之可羞
方喜嘉蔭之是托乍茲阻濶實有依歸敢望善履餘寒
荐迎多祉

與饒州太守辭免權幕官啓

子厚蘄見權公非能朝造而夕謁建封克用韓愈不為
晨入而夜歸何特蓋于強顏正復弭其狂疾至有長者
之高誼得無雅意于古人伏惟某官天付遠猷世獲重
語朱轡畫戟漸彷徨其要津墨客詩人猶形模於少作
下車一日奠枕萬家豈惟獄市之并容未忽米鹽之煩
碎至於東辨人物必先濶略簿書某得備屬官絕無能
技案此下五字原本缺故態獨不果於閒居拙異安仁之褊心了
何疑于巧宦可謂支離之受粟敢為舒緩而養名况斐

文無用於當時又奚逃於醬瓿顧綿力不堪于長坂姑
欲避其鹽車今吏情薄如雲煙惟學癖牢於膠漆間而
誦讀雜以呻吟苟無細故於胸中甘老分陰於窓下况
須少日遂可解歸或假三冬俾之足用望裁如此公獨
謂何

到秀州謝執政啓

羣材並植肆望杞梓之成林短羽退飛盡投鳬雁而為
伴第可江湖之歸去豈堪民社之承宣此盖伏遇某官

身運天樞手執人柄生成萬物而寒暑必信進退百工
而邪正自分談笑巖廊夢想人物顧翱翔要路既盡收
經術之諸儒獨牧養小民尚兼取簿書之俗吏迺俾寄
身於飽暖何敢企望於功名重念某畎畝餘生門牆舊
物雖蒿萊之未出然本擢於勾萌借風雲之不隨蓋荐
長其卵翼受恩深矣圖報缺然悵渤海之方春旅駟先
謝惜崦嵫之晡晚馬首何歸感媿既深歸投益切

賀執政啓

伏審孚號大廷登庸哲輔羣情久徯而忽獲和氣不召
而自還在昔王佐之材或見畎畝之內至遇合之時蚤
晚略異而經綸之志顛沛不移矧政路曩所周旋未幾
忽收於膚寸而真祠久於涵養一旦大決於隄防百里
為驚萬穴來會恭以元聖在上朝陽當中天光清明雲
陰解駁付倉公以鉞石衆疴自除屬雨師以風霆百穀
是仰伏惟某官著龜羣疑之信權衡萬物之平股肱主
躬筋力國體立朝居豪傑之目得道本清淨之門天降

大任而初乃或艱帝賚良弼而終不可圍徇身之謀常
若不足經國之器乃自有餘濯痍噓寒初出立談之助
破涕為笑連於置郵而傳況運動樞極以通政機掌握
至公以為人柄喜及荊州之未老遂得相材賴有太原
之奏存自應天啓某頃緣編削幸備官僚適傳羹之不
和坐魯酒之自薄羣公未嘗與之題目諸生猶數見于
排根蘭陵此時亦自喜抱闕之賤淮陰前日矧不過執
戟之卑但冀未死於饑寒尚或有待於振出竊以夫子

攝行魯相豈獨喜於下人公仲輔佐烈侯誠有意於進士蓋出社稷之大計不緣賓客之私恩仰惟談笑巖廊夢想人物太平之基既立勢成九簣之堅清明之象益昭力當八柱之健某當填溝壑莫望門牆但遠同於蒼生亦均依於盛福

議禮改官謝執政啓

大鈞播陶物無廢者細流歸往海獨容之賦么磨於萬形之間收涓滴於百川之內未云有用不使無歸所以

溝壑之捐誤置文書之選素餐少日輒冒上恩白首半
生僅通寸進雖獲磨光而濯色尚餘弔影以慙魂竊謂
國家積德百年同風三代為其禮樂屬我君臣非若曩
日第藏名物於有司必使斯人皆被教化以成俗更復
遠稽於治古蓋將盡

案原本
有脫字

於官名必得博碩之真儒

庶就昇平之盛典矧捐官寵因起滯留可容濫吹其間
聊使餬口於是此蓋伏遇某官虛心天下康色朝廷搜
羅四方之俊良陪輔一時之遺忘遂無伏死巖穴之士

更空隱轡卜祝之徒譬若橫江而漁絕雲而弋顧盼有
頃飛潛並收何獨在一鬱而得伸亦概見寒遠之不隔
仰惟代天理物妙同歲功安土居人力均坤載可謂魁
壘萬人之傑尚乃濶略三公之尊士不待推食而解衣
身可使蹈湯而赴火重念某筋驚肉緩材拙意踈一歲
寧冀于九遷十駕不能以千里況侵凌憂患之後偏仄
饑寒之餘志氣已衰分無遠到語言少味事亦寡諧犬
馬第識主人之門當不死于內熱雪霜或變羣木之色

蘄不彫於歲寒欲答所知請堅此意

得真定倅謝執政啓

薄寒中人莫借一言之煖太和蒸物忽同萬物之春急絃雖發於危機弱羽終依於大厦惟憫窮悼屈本出於至公然刮垢磨光卒成於委曲念未嘗備洒掃於下館曾不知累題目於前旒卓然古人之賞音不待平時之識面自忻際遇衆為驚嗟恭惟某社稷元臣文章司命手運樞極實代天之四時身備股肱蓋與國而一體夢

寐不忘於寒暄昇平有待於丹青謂如文王之朝必有
多士欲任伊尹之責所憂一夫伏念某瓠落無容齟齬
難入少既乏於奇響幸猶同於卑飛弄槩磨鉛不過犬
子浮華之作款關持謁未免禍生漫滅之譏曩輒挂司
空之書初不盜相君之璧遂久廢而不錄亦徐察其無
它然搔之不絕者良已童然殆挽之俾前者不及寸許
何敢視儀之舌在正苦減仲之產空所貪盛節之清明
聊寄餘生於紅腐尚乃風聲之飄墮要令雨絕於天肆

其波言之蕩流不使堆出於岸方此有言而不信頗謂
無因而至前不圖察魯酒之見圍聞商歌而許載料理
於摧傷之後吹噓於唾罵之間假以治中稍令補外恩
隱可勝於周渥人地則至於超踰遂免無歸是為過望
然適當遠去疲馬顧不戀軒苟欲求便安窮猿何敢擇
木况佩刀非三公之器食肉無萬里之姿端念旅翮之
飄零恐逐飛蓬而轉徙借欲激昂而効力未免俯仰以
隨人瞋目語難素不習大將之旗鼓束髮為學但謹守

先人之琴書退則煙波釣徒之是歸仕則文學掌故為
適可已獲伸其厥枉或冀用其所長竊緣眄睐之不凡輒
復噴鳴而未已既取馬之按原本有闕文覲開以長途况猶泥
之在鈞不使憂為棄物伏惟此意不出它門

代王運判到任謝執政啓

人言僅白初假臨民突色未黔亟趨度嶺謝魚鳥相安
之樂涉山川甚遠之勤盡忠義之皦然雖蠻貊其行矣
蠶叢絕壁既搖叱馭之鞭鶉尾寒芒又照觀風之節初

謂棄捐於不畜今猶約結而無奇伏惟某官俯仰太平
棲遲盛福風翔巖廟光在海隅豈特繫本朝之重輕而
每累一夫之休戚故安遠俗宜得長材某雖孤節未彫
而舊學幾落雖顧平生欲有為爾然苟見用亦何以哉
獨先公道而後身名須以成事肯辭禁門而改情態急
欲操人儻涵濡上澤於干欄得退託傲軀於款段

賀兩府啟

伏覩詔書登庸哲輔國勢以重民望所歸伏惟驩慶竊

以朝廷紀綱於此而維持政令根本由是以植立斟酌
元氣四時待以和平鑪錘衆形萬物期於暢遂故圖任
裁屬鼓舞皆同恭以某官德業並隆文武備足以稷卨
之筋力任堯舜之股肱方旰昃以求賢宜朝夕而納誨
寧人能此殆天啟之仰惟太紫清明層陰洞徹昭景飲
醴方共迎於太和沐髮晞陽幸均承於嘉惠固當益著
太平之象端須畢究彌綸之方某瓠落無容齟齬難入
坐不能俯仰於權倖致無辜狼狽於饑寒念十年同於

積薪不充庭下之燎雖一旦棄如破甑猶當是鈞中之
泥遠嚮門墻空馳魂幹但下同於黔首亦均被於洪恩

賀豐待制移杭州啟

伏審光奉天恩寵移藩鎮雖尚淹於外補已少慰於輿
情竊謂餘杭為東南之大州太守必左右之近侍然錦
營故俗半存紆綺之侈心梓墓餘風共負濤波之盛氣
閱守甚夥顧民難治政寬則不勝惰驕如用鄉飲而理
軍市吏急則便復反側猶驅鳥雀之屬鷹鷂唯付道周

而性全不待令行而訟止伏惟某官文學前輩朝廷鉅
公如玄酒太羹本薄滋味惟青天白日自然清明第見
和風之顯宣莫窺浩氣之充塞崇陰聽訟不妨具足之
真如紙帳安禪誰識縱橫之妙用坐馳此道行安斯人
某擁腫凡材落魄遠裔少學古人之糟粕顧所言平平
老投孤縣之桑麻亦自考下下念依劉之日少將借寇
而天高同湖濱欲濟之人如中流而奪舟揖喜江滸待
哺之殍真大旱而望雲霓

賀蘇內翰啟

泥檢自天脂車就日慎選北門之舊別居東閣之嚴雅
待重人曲承密命伏惟內翰承旨道本自得事無可為
嘉祐之間共識鳳凰景星之瑞元豐之末益知泰山北
斗之尊霜雪所餘波濤既定及見松筠之茂已緘蛟鱷
之饒出入羣經熟沈浸於醲郁徘徊清禁遂黼藻於王
言陳義甚高獨立不懼頃得州於第一由所請之再三
惟上之深念圖賢如公之不忘致主鴛鸞盛集仍是銀

臺之舊遊山水餘妍定入玉堂之清夢固不為賦詩以
觀餘事蓋且將問政而求讜言爛爛日星發光芒於筆
下溫溫布帛散和氣於人間乃所望於尊儒實分權於
宰相中外僉允今古獨難某與世數奇登門最後思收
能於鈎槩薄借論於齒牙參朮桂芝願備疾疴之用拓
拘枳棘固難生長其間雖升斗足以活魚非江湖莫之
容瓠惟公遠大專我始終上眷雖隆東之猶為未用羣
生欲遂安石得不同憂蘄快輿情當究大任

赴任與湖守學士啟

一丘雲水逝將植杖而芸百里溪山又俾戴星而出蓋
未知操刀而使幾何不頓纓而呈恃大賢為之依歸將
末路忘其蹭蹬伏惟某官思走萬象氣吞羣英上則當
處廟廊次亦宜綰華近稍淹出守行促歸裝姑寄一尊
之風流長助兩溪之煙月某天資不敏人事多奇蚤衰
而疾病侵凌未老而齒髮搖墮割雞非善寧繼武城之
音封侯不貪願識荊州之面即搖竿而去國將斂板以

望塵忻幸之懷尺書不盡

代王守到任謝楊馮二漕啟

初分州寄尚偷歲月之寬閒未滿戍期遂去田廬而匆遽雖簿書之亂眼喜江山之可人情既安之事或濟矣然莫副編民之素望所忻從使者之多賢某官高誼自將善名日起智識絕於流輩不勞予奪於十州議論公以是非自足臧否其羣吏逮指顧之餘事猶餽給于羨財某竊望門牆重拘城鑰方布宣于上澤使周知法令

之寬賒雖歸賴於下風敢小忽米鹽之煩數尚圖面罄
頓覺心搖伏望益慎夏以加食當對時而受福

上胡侔啟

某官德懷雅俗望重本朝佩刀光鉉顧不煩於投刃題
輿榮問亦誰可以並驅惟湖山清遠之鄉有歲月優游
之樂某天資不敏人事多奇蚤衰而疾病侵凌未老而
齒髮搖墮是行既迫於餬口餘光猶托於庇身即理施
於波濤行望塵於旦暮孤衷欣幸片紙莫窮

到秀州謝監司啟

湖海再遷不繫有無之數簿書百謫但招尸素之慙政
應斂翼於故枝尚復強顏於末路已荷優容而不逐更
加推挽以使前自惟棲遲莫副期待伏惟提刑某官器
局博裕風猷峻清雅將冰鑒之明喜為人物之論假以
青黃而成飾要令黑白之殊流顧歟喁之鱗聊忻得水
恨虺虺之足徒費加鞭

得替謝監司啟

往昔子男之職本繫風化之盛衰迨今親民之官但隨胥吏而俯仰強顏折腰則衆矣申眉明目者誰乎方其冕笏不澄至與雞鶩爭食蓋古人風流之已遠而末路名節之浸衰但可鄙憐何足振起所賴諸公之多可尚俾小子之已羞伏惟某官直道以行恕心是用郎醉且加掩覆丞顰或在優存遂如曠官亦得理去更借齒牙之論曲成卵翼之私然平原之士千人下客未為無用矧叔度之波萬頃小物不勞并容重念某學殖已荒鬚

髮早化每困禮俗之嬰縛便欲狂顧而頓纓可勝簿書
之窘因何異扶服而入橐了無善政去屬遺民況求恩
愛以浹肌膚僅免膏液之潤華楚自非庇護而有素安
得罷去而無它今鶴書不招而自行牛衣屢泣而復止
雖聞士不在野敢覬白駒之維久嗟烏屢窺籠喜同黃
鵠之舉疲癯之意菀結可言

欽定四庫全書

東堂集卷六

宋 毛滂 撰

書

謝舉主彭提刑書

某昔者聞之執事薦某為職官撫心獨驚赧然汗發夫
京西數十州之地吏之有才能者正應不少而執事薦
章固亦有限一二年間題目將有所未盡今不以急賢
為務亦何取於某不敏也某讀書至惟帝其難之知人

則哲論語至舉爾所知爾所不知人其舍諸竊悲夫才之難人之不易知也舉者誠未必知之知之者又未必能舉也嗟乎公議日替矣薦舉之事蓋已收為私恩人之所私者寧復計其才不才耶當今監司至於郡守皆得以吏之能否言於朝而黜陟之其間以類相求者豈盡可觀耶况一日奪於權勢移於故舊乎此有識自好之士咸重於去就也今權門懷書上謁之人以奴自居有所挾持而來卒為門生座主上下無復分辨亦可醜

也孟子謂觀遠臣者以其所主觀近臣者以其所為主
孔子曰君子難進而易退則進退自不可苟前人有言
貴視其所舉富視其所與貧視其所取此相擇之道也
今天下薦舉之路廓然朝廷求賢如不及某亦私怪得
人為未盛十室之邑必有忠信也意其主黜陟者未盡
無過耳某不敏於事無他技能為壽張尉一年雖同僚
皆落寞相視未嘗許為識字人望姓名掛部使者之齒
牙不其難哉又樸野自信不能戴不肖之容搖尾乞憐

於人又非有才名賢行可以取大人君子之知蓋亦見
踈而難合也平日非公事則閉門讀書困睡渴飲甘以
沒沒薦舉之路絕望久矣不意執事提撕收拾欲使出
於泥滓沈埋之中不知感激之發矣雖然出於伯樂之
廢者必良馬藏於卞和之匱者必美玉游於大人君子
之門者必卓犖瓌奇之士如某者樸慤不足數馬之駑
駘玉之碨砢爾此大人君子雖排逐而棄之可也伏惟
執事以文章名天下第一而開懷好士不以富貴自大

然惟其善故能舉其類此某所不宜出門下也或者商
擢人物將拔十得五則某也幸置於取舍之間郢之僻
陋士之才可以有為者不至吏安於因循苟簡上下之
習以為便某月得俸十二千祿粟三石自念不敢苟飽
待去以故忘其拙踈慨然欲將區區有為於百里之地
而羣嘲衆罵去有餘嫌執事且薦以居官為能竊怪執
事何所聞而得此言也某少年時狂狷好功名不量才
謂富貴可俯拾以得今方守死苦幽日惟病憂志氣彫

落無復聊賴矣所謂雖對一美衣遇一盛饌尚當泣想
風樹悲思無窮而某顧有他望哉先人弊廬藏書數千
卷聖賢具在杜門謝客聊以永日所謂富貴貧賤一切
付之造物矣願執事勿求某以必取富貴為門下之報
求某以讀書自勉期於少過不為知己之辱以畢其身
為善人此某素期不負於執事者如此執事以為如何

上陸侍郎書

學道如食羹酸鹹當自知不可以語不食人作文如時

世粧妍醜不求其質而惟粧之求此未足以識其真雖然道不以文傳將孰傳之傳道者特未嘗有意於文耳及乎成文正自善也顧如食羹然亦當食者知味也某結髮從學二十年間見為東家丘之言者且多變矣頃時細字厚冊豐碑大版出一時文章爛然滿目某雖未果曉會然見觀者皆有不可企及之色相視慨曰文不當如是乎異時老書生新用亦各立標裁學者覽其筆勢又曰為文正用如此某於是乎疑焉道果在茲乎不在

茲乎將作者無意於明道而學者惟文是求乎昔秦伯嫁其女於晉公子文衣之媵七十人至晉晉人愛其媵而賤其女此可謂嫁妾未可謂善嫁女也學者將以明道道未明而文以蓋之此秦伯嫁女之謂也伏惟某官沈酣六經穿穴百家吐道為言須臾成之此天下學者所共仰而不以時所用舍為去就也某願朝聞道而夕死之人爾不願以文章鉛華自媚於世然少而學之老不覺悟閣下頗哀其志幸分一杯羹使知酸鹹且洗其

粧而出其質然後庶幾是非乃定嗟乎身遠地寒何足有犬馬之報於門墻下徒區區抱此心而已

上蘇內翰書

內翰先生閣下飢者甘食渴者甘飲是未得飲食之正飢渴害之也今之學類於是某請試為先生言之夫學亦不一也蓋有樂其實者有好其名者有學以為道者有學以為利者利而後學則亦無所不至矣人莫不飲食鮮能知味為其以飢渴害之則何以異乎利之害於

學故凡可以釣爵位而不失於利之所在者雖之楊之
墨之佛之老皆為可學是猶凡可以飽滿於飢渴者皆
為可以飲食本朝以文章聳動搢紳之伍者天下最知
有歐陽文忠公中間先生父子兄弟懷才抱道吐秀發
奇又相鳴於翰墨之圃如長江大河浩無畔岸崇崑崙
壁萬仞崛起此天下所以目駭耳回而披靡於下風也
為兒童者記誦先生之言能論撰者盜竊先生之意視
先生以為規矩繩墨未有以方圓曲直逃者也熙寧間

作新斯文而丞相以經術文章為一代之儒宗天下始知有王氏學灝灝乎其猶海也其執經下座摳衣受業者如百川歸之海於是百家之言陳弊腐爛學士大夫見必嘔而唾之嗚呼一旦取覆醬瓿矣當時歷金門上玉堂紆青拖紫朱丹其轂者一出王氏之學而已先生以為彼真有以知王氏乎其心誠樂其所學而好之乎不二十年間天子出丞相不用也其議論益彫落而文亦就弊矣主上新即位諸公以耆舊得召合於朝廷間

其老儒宿學平日宛舌同聲而湮鬱不快者一旦開其約結順風而疾呼應者蓋已如響而王氏之學又將覆醬瓿矣先生以為學士大夫今日從先生游者為誰何是皆前日規矩繩墨於先生者也然王氏之說殆亦滿其腹中蓋亦中間叛先生而去者耳自先生兄弟入朝某由二浙歷淮泗至於京師有服儒衣冠者某必問之今公卿大夫以經術文章進者誰為能必曰不出先生兄弟宜誰師必曰宜師先生兄弟先生以為彼真有以

知先生乎其心誠樂先生之所學而好之乎先生之名
滿天下雖漁樵之人里巷之兒童馬醫廝役之徒深山
窮谷之妾婦莫不能道也是天下所共知也某以為其
人之所以真知先生者非天下所共知也王氏之學固
未必人人知而好之蓋將以為進取之階宮室之奉妻
孥之養鋪啜之具耳此某所以病今之學者為利蓋如
此而已矣某少知讀書頑然樸魯聞道甚淺然其所學
則周公仲尼之道非進取之道也古人今人前輩後輩

某不知孰重孰輕從其是者而已伏惟內翰先生道德
根於心華於文章實於事業其已著見者四方之人所
能共談其深而未發者純乎淵然某又安足識其一二
而稱頌之某行橐甚貧特所載經史足用幸不乏先生
之文每一發帙其經於目如文繡歷於耳如鐘鼓誦於
口如膏粱知其如是之美也終未足以知其所以為美
故將學視於離婁學聽於師曠學味於易牙然後可以
盡知先生之言如文繡如鐘鼓如膏粱之義然三人者不

可得而見則將何以盡知先生之言乎先生亦將坐觀其聾瞽不靈而蒙於衆人乎又豈哀其心勤志篤將提其耳刮其目礪其齒使踈暢廓達其聰明而昭然有得於先生者大異於衆人則先生亦何愧於孟子之三樂謹獻雜詩文一編惟先生哀其意而幸教之

再答蘇子瞻書

仲夏毒熱伏惟內翰先生台候起居萬福昨晚得所賜台翰伏讀百過輝光之密溫其儼然如在眉睫念假借

過情識者疑而不服韓文公以文章自振一代觀諸權
門豪士如僕隸焉瞪然不顧而頗能誘厲後進先生豈
所謂欲誘而致於是歟孤衷佩服厚賜愧慚汗發人有
過龍首之山獲堅白溫潤之石碌碌然異於尋常之石
也自疑為連城垂棘之寶出之里巷之愚人方且與惑
焉更求玉工相之夫然後玉石辨矣為玉工而要必能
知玉顧豈易得哉此楚王時非無當其名者而卞和卒
以兩足異處泣盡繼之以血也某向學孤陋頗復荒落

於憂患間今儒宗文師磊落相望而某三千里懷其所
得陳腐無味之言徑獻先生之門者不可謂之無意也
以故自比於龍首山得石之人期先生為深知玉者今
先生將掩口胡盧而笑之則某以為石將教以華篋十
重緹巾十襲而珍藏之得五城之都而後許其一觀則
某以為玉其信於先生者坦然不疑如此亦將曉其無
意以未辨難分之石欲遽張皇於夜光之側也先生教
曰品目高下蓋付之衆口某竊惑之西漢時有揚子雲

聖人之徒後世學孔子者蓋嘗想見其人於千載然當時深知子雲者不過侯芭桓譚輩二三子耳則其道理純疵品目高下果不在衆口伯牙失鍾子期至於絕絃破琴騏驥之馬伯樂回目而顧然後知其為超遠之足則琴之妙音不在衆耳馬之駿骨不在衆目為甚明矣某也不敏其未已之學他日之能否請今日從先生而定某又嘗讀傳記見古人相汲引之事頗不一於此亦不能無疑欲終言之則近於屑屑急人之知以故不敢

復一二數也先生之居燕息游閒之處樹石茂密之間
當有鮒鮓蝦蛭邂逅於泠然之池先生策杖閒暇注目
逍遙遂小物之適以起遠思必擘粒引泉覆以蒹藻蒲
苻觀其浮沈洋洋自足於杯勺之微而心悅之尚宜知
有橫海之鱣吞舟之鯨跬步而絕於天池七澤之陸幸
而至於水必能作飄風之澎湃卷飛雲之蔚蒼鼓鬣奮
鬣於浮天浴日之浪變化一息回復萬里也今泥沙敗
其鱗鬣螻蟻集其背腹其已涸之沫又不足以自濡有

人力能行舟於陸者偶當其前魚不能人言猶頭掉尾
頓冀其人一出行舟之力而致於水乃姑睥睨而過之
曰非渤澥之濤滄溟之波無能活此予何能為予何能
為殊不知有行舟之力為可以必致於滄溟渤澥間而
活之也當是時欲要策杖注目之顧希擘粒引泉之惠
以夷猶於蘊藻蒲荇間曾不如池中物區區此言惟某
之狂愚不知習人事者能發惟天下士夫所責望如先
生者可聞此言

附蘇軾薦狀

翰林學士朝奉郎知制誥兼侍讀臣蘇軾右臣伏覩
新授饒州司法參軍毛滂文詞雅健有超世之韻氣
節端厲無徇人之意及臣嘗見其所作文論騷詞與
聞其議論皆於時可用今保舉堪充文章典麗可備
著述科如蒙朝廷擢用後不如所舉甘伏朝典不辭
謹錄奏

上傳侍郎求誌文書

某竊謂唐之諸儒以能文名而直筆確論信後世以不疑者孰如韓退之退之銘人之墓五十八非盡達官貴人也書其善而已張圓一法曹掾爾無甚過人事其死也妻婢奴抱嬰兒從退之乞銘遂得銘此君子樂道人之善故舊不遺如此其盛也某罪孽餘日不早從先人於地下今墓草七變霜露矣而遺烈未傳往者走京師求閣下一言以表於世盖嘗面可既已多歷年所數奉書輒不報某適攜諸孤之江南求升斗以活絡以簡書

如首羈銜欲復至門下不可得也痛念金陵之舊謦欬
可記而翰墨未乾賢者所為必表裏今昨當使人無少
可疑者則前日之厚人也豈至於今而卒薄哉韓退之
與人交榮悴不移非獨退之如此古賢人正如此爾某
平日所知傅公為天下賢者可以義相責望今而求滿
所欲者不過如此此亦閣下平日所不吝者某雖貧賤
不如人顧且效嬰兒之請知閣下未有以絕之也伏惟閣
下朝廷夙望天下至公退無悶容進無矜色方坐廟堂

陪國論海隅之人瘠欲得肥凍欲得溫固必有以應其
求况一濡筆書人之善以寵故人之魂何靳而重不與
也抑公權以書自名當時公卿大臣碑版不得公權手
筆人以為不孝况其言賢於公權之筆者耶閣下立孝
治之朝以忠厚自將必以此道覺斯民肯使某因之有
不孝之名哉情意哀迫干冒台嚴卑情不勝悲懼之至

與曹司勳書

昨匆匆草答未盡愚衷某騷滯不涉經學不工詞章然天

與所能獨在識文字之形狀一見輒知其妍陋此譬之
善觀畫者手未必能畫也每以自信如此故於士大夫
間聞其言往往欲敬而反生嫚心前日乞亡妻之銘於
左右初亦疑其非分所當得將往而不出者數四既而
念之古今惟文墨事不可妄以屬人某不幸天與此能
使得詆訶於諸儒之間以取嫌罵蓋紛紛矣然彼殊不
知蕪惡之敗人意惟恐所見不妍也如遭臭必掩鼻至
得芬馨則奮袖張懷而招之獨患其不來爾以故某之

於公既自忘其賤又忘公之貴惟文之妍是貪乃徑欲
奮袖而招之攘而納之懷也不知乃有犯分之戾公觀
盜欲取金玉必入富人之室雖高其垣墉嚴其守備韓
盧欲搏枹鼓屢驚猶當徑前不顧而繩樞草舍懸磬之
室其入雖良易顧何所得哉今公雖深閉牢拒攝緘滕
固扁鐫而某之為盜心固已有定計矣儻公以某不肖
修己之不亮名譽之不立又妻子素賤不宜得高文或
者以師帥之尊不應私其民而與之周旋則非某所知

也過此則何嫌之深耶某甚貧先人有不腆之田不足以給饘粥是豈有抑子厚論王參元之嫌哉韓退之銘人之墓五十八豈皆退之自喜為之銘者耶將不能斬已之所能拒人之善意爾張圓死妻婢奴抱嬰兒乞銘遂得銘公學退之者也某且效嬰兒之請公忍絕之乎欲詣門下昨夜忽傷風不能出又口不能略盡梗概謹遣人奉書左右必冀哀之

答汪發秀才書

汪君足下僕用子弟入官天資椎陋不自敢與進士齒
然又竊好此名頗願學焉每取其文章讀之百過反悶
然不樂因不得窺其淺深故僕所學了無用於時為諸
儒非笑足下乃幸臨之又辱書見譽此豈陽浮好言將
反暴其短於學士大夫耶雖然亦異矣僕頃三四見足
下文章初甚喜久復為足下不快何哉不幸以僕能識
之爾僕能識之則獨於古可用足下方進取不求用於
今而求於古非計之得也愛惜足下美才日冀相見講

去此病今反惠然見訪繆欲益求僕文觀之此欲引年而進猗苓知足下未有以却老也文章細事爾無補於世之治亂無增損於人之賢不肖有天下者專用此求人材悲夫非先王之意也足下苟欲拾科第馳聲譽則進士之學激昂有餘矣苟思退欲善身進欲澤民則先王之言具在亦更思其意而已文章真細事哉二事皆非僕所有甚懼無以報足下然講學之間儻欲寄心目舒心意僕有玩好之言如古鐘篆鼎可賞而不可用當

為足下羅列於座隅矣區區惟幸察

上監司書

原注為響應
龍求爵號

某竊謂上之愛民甚於慈母之念子凡可以免其子於疾病飢寒者無不為四方萬里上不可以自攜拊其民也故屬於吏必曰寒者裘飢者粥暍者扇敗羣者去之其治無狀不能如上意而民乃無聊則部使者察之言於上曰可逐今日言明日逐矣苟幸稱職百姓安於田里有以活妻子養壽命則部使者又察其所以然當深

言屢言不一言而止則上之爵將無所愛惜然上屬部
使者亦當不問其長者家兒不知其寒微遠裔亦曰賢
不肖之辯吾職當如是爾且吏廩於上廬於上廝役於
上苟稱上使令則責報於上又即無厭今武康縣響應
山碧玉潭有龍焉能為上出雨暘風雷變化五穀收飢
致豐破厲導和所以惠寧斯人甚厚而於上非有廩廬
廝役之思也亦適當幽澗寒谷僻陋岨深之地雖載圖
牒世莫知之獨山僧野人脫粟寒漿往相敬戴爾某縣

令也以旱澇故數為其民以請雖賴以濟千萬人之命然身賤言輕不能為言於朝廷使潛德久鬱幽光永閉可為歎息伏惟部使者任刺舉職為上憂民之疾病寒飢當亦如慈母念其子今龍於民有厚德不止於裘寒粥餒扇暍而已呼吸陰陽開閉日月實豐凶所歸宿而民命所依憑又在使者所部其賢於能吏不翅十倍獨坐沈沒幽澗寒谷之間其勢不得逞而衆目亦以此易之此不可不察而有言也且祭法德施於民則祀之以

死勤事以勞定國能禦大災能捍大患則祀之亦何庸
必取名山大川乎所謂刺舉吏之賢不肖亦何知其地
勢族望或高且寒顧治狀如何爾嗟乎某所過郡縣田
野間見祠宮峻真者甚衆詰其神則無名氏在人口耳
然簫鼓牛酒日至其庭不絕也問之則曰曩窘雨而得
霽望雲而下澤蓋謁水旱者有適與雨暘相值遂邂逅
滿欲雖他日復禱則不能更得然人既已神之矣異時
竊號為寵素餐不靈徒土木塊然之質彼烏有羞愧之

心寧得以義理相責望耶豈如此潭之龍無響不答哉
凡興雨者龍之職龍既不失職矣而所托潭山又名響
應而能應之如響是豈惟不愧其職亦不羞其地矣與
竊號而食冒華屋而居淫昏不靈謬托人上者甚異惜
其所依隘所施約爾異時辭湫潭謝魚鰕顧眄層雲掀
舞百川蜿蜒萬里則其施豈不大且廣乎然是山秀拔
蒼潤而竒石虎踞老樹蚪矯枕清冷之淵附孤絕之岸
而暮煙朝霞自相映發如欲俯而照其影如將下而濯

其趾正是人間佳處四顧亂山乍高乍低皆黃茅白葦
嶮頑闌茸雖上矗霄半徒累土耳未可與是山爭勝也
則龍之居雖約蓋已善擇其所處矣某屬者祭畢徘徊
潭上頗有所感不覺狂言之發惟閣下以主上憂人之
心為先又以刺舉自任為一言於朝意上亦何愛封爵
之虛名耶猶惓惓於人如許使知朝廷有尊寵意當不
陸陸如土木偶塊然竊食而已將有儉歲不入吾境而
武康世世不識飢色閣下之賜邑人不甚溥與

上監司乞修縣學書

天下事有可恨者二古以為是而今以為非法以為不可而人以為可何則夫子論次詩書修起禮樂以素王之功充塞天地其道蓋與王化相為終始故自三代皆有學官自非焚詩書坑學士學不可廢也周魯侯歌於詩人蜀文翁贊於太史范武子鍾離意之徒或至用私錢作廟史臣書之以為美談朝廷廣厲學官之路詔刺史縣令歲時祀孔子如典禮一州雖數縣縣必有學宮

此豈特謹祀事而已哉鄉之秀民服方領習矩步委蛇
乎其中學先王之言以待上聞養君子器直須時用爾
雖一畝之地而禮樂法度自此而出使人識君臣父子
之綱家知違邪歸正之路嗚呼盛哉不可以有加矣然
郡守縣令為治無所用學者亦衆其侈桶蠹楹或仆於
風雨頽垣斷甃半沒於蒿萊者相望至或取以為逆旅
舍者有之幸而書生弟子有懷先王之厚德發憤於禮
文殘缺之地將作而存之則執法之吏痛繩以文世且

指為罪人矣此所謂古以為是而今以為非是也且浮
圖氏特天竺之教爾今其長廊深殿繡栴綺䟽極土木
之麗以困民力又鬼神之祠旁午於天下皆耽耽高堂
金碧照映為之無益於國無補於民肆為之而執法者
未嘗以為言天下未有以此獲罪者此所謂法以為不
可而人以為可也今庠序榛蕪而過者不顧佛廬有一
傾撓則左右睥睨咨嗟歎息若將下而壓已焉嗟乎使
浮圖巫祝自為此可也使市井小人為此可也使富人

大賈無知之人為此可也今公卿大夫往往為之恬不為怪矣此幾何不役使於淫昏之鬼乎班孟堅云夫移風易俗使天下回心而鄉道類非俗吏所能為也此某所以諂諂懷不自已之意於左右某所領邑蓋有學焉獨在寒波孤渚之上桑楮之間無垣無門無有講肄之位師儒之室而丹青憑附之質亦窘于風雨所謂俎豆管絃之地則牛羊游焉邑人儒服者裁五六輩父兄以子弟能力田樹桑者為材此豈土地人物頑鄙而不可

刻碑如此直教養有所不至數十步之內必有茂草萬
家之邑豈無人焉鞠為園蔬牧兒莠豎至於薪刈其下
史臣書之以為戒恭以主上嚮意儒學方興辟雍設庠
序陳禮樂隆雅頌之聲盛揖讓之容以風天下武康去
天子之都裁二千里王化所被德音咫尺然但見長廊
深殿皆荒率之教爾學舍頽弊鞠為茂草有識者誰能
不慨縣令柔懦畏罪能言而不能行之此天子之不材
吏先王之罪人也會詔修廢廟審上以屬明公某敢再拜

敬以禮義之事奉歸左右庶幾回鄒魯之風於筆端吹
發士林之萌芽異時邑人簪紱交映絃誦相答至於帶
經而鋤擔薪而歌者皆負國之重器史臣將書曰東西
浙部使者以勸學厲賢聞故豈不粲然可觀哉伏惟不
當深讓也

上姜朝議論發冢獄書

知府朝議執事某讀唐書循吏傳見田仁會為都督境
有風賊依山剽行人仁會發騎捕格夷之城門夜開道

無冠跡逮為金吾有絲毫姦必發廷中謫罰日數百薛
元賞為京兆尹都市多俠少年元賞到府三日收惡少
杖死三十餘輩陳諸市此二君殺人不疑初若剛忍少
恕然曾不失循吏名者何書曰辟以止辟乃辟蓋行辟
者將以止辟故辟而不疑譬之牧羊百而一狼縱橫其
間縱狼不除則羊且盡死而無餘骨百羊盡而狼欲未
厭則一國之羊皆狼吻中物愛物者常不忍殺然此狼
不殺果足以為愛物乎某愚有餘賤不可言輒因厥職

顧有獻於執事某事執事三月於茲矣知執事為良太守也修庠序如欲教其親子弟為上理財如視私帑中物禁民為非如去心腹間病庭少留訟而囹圄屢空也然某尚不能無疑者二三事爾前此有壞民冢破棺褫衣者又有白晝提金刃為羣盜傷人者嘗議緩其死此無傷也是乃仁術也故曰仁民而愛物之謂也然或曰仁者必有勇何也勇者勇於為義義者適事之宜而能斷者也君子犯義小人犯法不斷則亂亂則傷民而害

物民傷而物受害為仁者若之何其坐觀也破冢之患
自其殊休戚者視之事若小然求其親親之心則銜冤
抱痛甚於刳鬻其膚齒也羣盜提金及嘯呼造人之庭
當是時一家知幾人其命懸此四五夫之手亦殆矣今
姑以其偶無甚傷為可恕此二事切於其身者而後知
之然冢間之盜既往不可悔已獨賊囚在獄彼蓋自分
死所寬之當遺患於人而不細况諸邑椎埋之姦未盡
悛彼嗜於利知必死猶不怖今復示以生路則彼何憚

而不為此祇以滋盜爾且去殺者仁政之盛也然必先能勝殘則殺不除而去如其不然則謂之惠姦此未易行於今日至於誣告一事此某實懷憤悶不平勅云被殺被盜及因水火損敗而挾警嫌妄指執人者從誣告法彼實被殺也實挾警嫌也實妄指執人也今議者皆以為不然且毆人於十日所見之地又誣人者正其闕徒而被誣者獨相去一里間未嘗相聞也逮母為他弟來而二子傷矣將扶致以歸始求被誣者一家借輿是

誣人者一家皆嘗及鬪所較然知鬪之所由來為明白也獨其父云不知爾今市中朝有鬪者則一國之人暮皆知之豈有二子與人鬪一傷一旦死又非在窮僻無人之處而倉卒及此經宿始以告官設令不親見其事則審之已熟矣今乃曰不知無是理也天下之親莫親於父子父子之間有屬於嫌而不可共議者雖或知之而辭以不知可也及其事有至此極者亦何情而紿其父今人有訟於官必謀之父兄以父兄為未盡又謀之親

識以親識猶未也則更謀之市人謀之吏而後以聞今此人果誣父以聞是致其父於重罪不孝莫大於此苟謀於父而以聞則誣告明矣將何往而逃責耶必曰彼獨與父言未嘗言於官不應罪則今而後子欲誣人則使父以告父欲誣人則辭以得於子誣告之法不復用矣漢宣帝詔年八十非誣告傷人他不坐誣告之惡其可深嫉自古如此且法者天下之法爾天子不能自專以付廷尉而州郡則以付理曹掾負此責者可謂重矣

然位卑身賤勢有以屈於人言不得行其志雖衆人亦蔑然下視之如無物嗚呼身可當此辱而法不可蔑視也執事素有高誼淹留一州蓋無負於下者下之人實負執事不一某不果盡言之請試舉其略今執事下車如此其久也公家之事其大者行之當有條理而小者若一事偶未盡留意能自保無纖毫之缺乎某以為雖古良吏不能無缺也誠有之則拂心正色引義於左右前後以補執事之缺者果亦有其人乎無其人也其搖

尾搗翼哀鳴乞憐欲僥倖執事一日之誤知者亦何暇
及此自古人為善者有助未有孤立能以成事者執事
為善之勢亦孤矣某願執事引善人自助以報上分寄
之重後漢王渙為陳寵功曹當職割斷不避豪右寵風
聲大行入為大司農和帝問曰在郡何以為理寵頓首
謝曰臣任功曹王渙以簡賢選能主簿鐔顯以拾遺補
缺臣奉宣詔旨而已某願執事行之他日還朝以此謝
某江東鄙細人也以拙自許故每轉喉輒觸人諱頃得

此官凡二年當上終恐以拙招悔尤正復多病故又過所上期一年始自勉強以來執事憐其愚而貌接之甚溫某亦誠不欲雷同苟且緘默為自安策以負執事於聽其言與不聽惟所取舍如何爾未信而深言宜有罪

上饒州安太守論朱逮獄書

秦始皇兼吞之世專任刑罰囹圄成市天下愁怨相與潰叛漢高帝初入關出民於密網中為摩其毒螫以膚肉之蕭相國鎮以無為而天下大喜所與約法特三章

爾何其濶略也然必先曰殺人者死荀卿云殺人者不死傷人者不刑是惠暴而寬惡也殺人者不可不死雖治古皆然而百王之所同也此非特為匹夫衆仇棄罪至重而刑輕民無所畏亂莫大焉禮曰刑人於市與衆棄之衆之所棄者誰獨與之存哉朱逮殺人具獄上法當論死有司請致之法執事疑焉某所未喻繼請不獲命卒排而去之蔑然也今而後不敢復譟譟求効愚計矣孤憤未攄庶幾有以自解者故尚欲為執事盡言之

小人固多怒喜鬪然怒不自作鬪必兩起至循其端而要其終則皆鬪也今石明之怒造端於朱逮而逮之鬪則明實起之既鬪也則皆謂之鬪矣律云鬪毆殺人者豈此之謂乎兵凶器也操兵者無善心石明之來意不利於朱逮明矣逮欲求脫死則更為計而已反以刃迎之者何也必知不能中明且死於明之手中之則死於法小人雖愚度能料此然一旦殺人若刺犬豕者其志非求脫死也直悍戇好鬪有不勝其怒爾律云雖因鬪

而用兵刃殺者與同注云謂人以兵刃逼已因用兵刃拒而殺傷者豈此之謂乎且兵刃已逼已尚不得拒以刃況逮深居藩垣之內障以門戶之固同處者數人而明特一夫爾去刃正復甚遠又安知必欲殺逮耶案云石明持兵呼殺此得於朱氏之黨耶果明之黨自伏有此言耶案云逮以從父祖在持兵備非常則石明初聞其父與逮鬪而持兵所以脫父之爭亦足為說矣皆鬪殺也而律獨以刃者斬議云謂鬪而用刃即有害心曾

謂朱逮無害心乎今此不禁他日鬪者往往閉門而殺
人矣開元間張公約與張楚立互相為殺楚既斷吭而
公約自刎不死中書舍人崔龜從請以故殺人論公約
死彼二人非有怨嫌忿爭之心而為此不得免惡其以
兵相賊爾比之以兵鬪者宜何如哉某不肖於人事殊
不通曉讀書又不能自表見而書獄豈所長今不幸從
事於其間偶簡書之曉然與思慮之所及者正不得不
守官爾執事以為非也操數寸之管即可論之朝廷而

活之天子亦以性命千里付執事某何預焉使有司不失官守執事為上廣好生之德一舉而兩全之顧有不
可哉某辱知薦之及日夜思所以答公議而無媿者自
念不敢以市道事執事徒心非而口諾苟且為容悅也
執事所以見錄者非有左右為之容又非以其能順言
阿意僕妾其態而嗟來之則執事亦必有以取之矣今
既仰失纖芥意得一事為罷去名何啻濯汙於清泠中
古人舍貴為賤舍富為貧正為此爾況升斗之粟反拂

亂其平生亦足顧藉耶今日之去就惟在一言短書以
謝不敏伏惟俯加裁察

